

四庫全書

史部

欽定四庫全書

隆平集卷十九

宋 曾鞏 撰

武臣

揚嗣殿前指揮使信之子以父任為殿直數有戰功累擢至深州團練使以左龍武軍大將軍致仕卒年八十一子承憲淳化二年嗣知保州有詔褒其治狀咸平三年敗契丹之衆於廉良除保州刺史召見特授團練使

嗣言久與楊延昭聯事臣不逮延昭一旦驟居其上臣所未安願仍舊真宗嘉其廉退竝命為團練使令嗣因持延昭誥與之

李溥始為三司小吏太宗論及財賦必召以問利害頗納用之擢為左侍禁自是進至宮苑使團練使兩以職貶責授右千牛衛將軍致仕卒年八十四子居簡文仲景德二年以溥制置江淮等路鹽茶礬稅兼發運使江淮米運至京舊止二百五十萬至溥遂增至六百餘萬

石擢為發運副使高郵軍新開湖風濤多覆舟溥課官
舟還及泗州者載石積湖中成兩狹岸其患遂絕正除
發運使既又進為修玉清昭應宮都監溥既久頗利權
內恃丁謂為之助又林特為其姻家故贓污不法以及
於罪

盧鑑字正臣金陵人淳化四年舉進士不中授三班奉
職積官至西上閤門使知秦州卒年七十子咸盛初鑑
廊延路走馬承受就除本路駐泊都監屢擊走繼遷焚

族帳積聚而獲其畜產以數萬計繼遷聲言石隕帳前有文曰天戒汝勿為中國患因入奏曰賊偽為此以紿朝廷宜益設備後果陷靈州鑑知儀州謀者言繼遷將由制勝關入寇詔徙老幼芻粟於內地鑑奏以為搖民心且民弱不可徙已而賊亦不至

周美字之純靈州人城陷棄其族閒行詣京師隸軍籍從駕幸澶淵自陳願假三數騎係契丹首領獻闕下真宗壯之特旨令入宿衛累以戰功遷天武都虞候監兵

延州元昊破金明美請於安撫使范仲淹曰金明地當
邊衝不可不早完之仲淹因屬美董其役既而元昊兵
數萬陳於延州城北美領衆二千決戰會屯山北多設
疑兵賊以為救至引去復攻艾蒿寨又夜出戰多設炬
張旗幟山上賊棄鎧甲牛馬而遁遂募工築萬安城而
還龐籍留之改東路都巡檢使又敗賊於金陽城明年
昊賊據永平寨諸將會議种世衡欲直擣賊美以為賊
料吾來必設伏不如間道出其不意世衡不從果無功

而美趨芙蓉谷大破之復擊賊於野家店逐北至拓拔
谷還屯永平寨勸士卒墾田歲收六千斛築柵蒺梅官
道谷以搯賊路徙鄜延路都監破賊於無定河乘勝焚
金州廬帳殺首領獲牛羊兵械甚多城龍口平寨賊精
兵數千來襲美以百騎破其衆累擢至觀察使馬步軍
副都指揮使卒年七十六贈節度使諡忠毅自陝西用
兵宿將數不利獨美前後十數戰皆有功焚寨復城堡
四十二招種落內附十一族所得俸賜悉分士卒子利

涉永清永正

焦守節字秉節以父彰武軍節度使繼勳遺奏補殿直累擢至四方館使榮州刺史以右神武大將軍致仕卒年七十六子宗說宗簡宗慶宗彛宗諒宗信初高溪州蠻寇邊命守節往議攻取計以為山川阻險非大軍之利遂招撫之三司常奏守節監香藥權易院歲課增八十萬遷閤門副使真宗謂宰相曰以財利羨餘遷橫行何以勸邊陲効命者止命以宮苑副使兼通事舍人常

使契丹館伴丁求說頗易之指遠山曰此黃龍塘也應
聲問曰燕然山距此幾許求說慙乃加禮焉黃龍塘即
德光置晉少帝之所

閻守恭并州人繼元敗徙其民於大名府因家焉少負
販并汾間聞郭進被人主優遇慨然曰使進不遇亦一
行伍耳吾顧不能逮邪乃應募隸拱聖軍累以戰功擢
德州刺史并代路鈐轄卒年七十五子繼恩守恭既仕
宦見士大夫必訪郭進平日所行以為法其慕之如此

故馭軍嚴飭所得俸賜悉以散施雖居家如對賓客

張綸字公信棣州人淳化中舉進士不中補奉職累擢
至乾州刺史知潁州卒年七十五子孝先紹先辰州溪
峒蠻寇邊以綸知辰州築蓬山驛路賊不得通方遁去
又修新興寨天禧五年為江淮發運使增米八十萬復
置監場於杭秀海州增歲課百五十萬疏五渠導太湖
入於海復租米六十萬開長蘆西河以避覆舟之患築
高郵北漕河隄二百里旁錮以巨石為十閘以泄橫流

又修復泰州捍海堰因命兼權知泰州堰城復逋戶三千六百州民為立生祠

安俊字智周其先太原人以儒家子得給事資善堂仁宗即位補殿直累擢至步軍都虞候陵州防禦使卒年六十四贈觀察使子介愈奔合俊歷邊任有威名戰功家藏書數千卷婚姻多擇士人常曰吾家集坐有文士過半平生足矣

王信字公亮太原人初應募潞州軍籍常生擒七十賊

以功補龍衛指揮使遷都虞候劉平石元孫三川之敗
信獨以所部兵獲數千級知保安軍以二千兵破西賊
數萬衆為高陽副都總管明鎬奏充恩州四面都總管
賊黨三百餘人鼓噪而出信悉捕戮之擢留後召為步
軍副都指揮使卒年六十一子繼恩信持重用兵未嘗
沮衄

劉平字士衡開封人景德三年登進士第真宗愛其才
將用之為丁謂所惡以為平將家子可委以邊事仁宗

卽位章獻太后思謂言乃自侍御史換以衣庫使累擢至步軍都指揮使靜康軍留後鄜延路副都總管兼鄜延環慶兩路同安撫使又兼管涇原路兵馬

石元孫字善長中書令守信之孫父保興官防禦使元孫以守信恩補供奉官累擢至邕州觀察使鄜延路副都總管兼安撫使寶元初元昊發兵攻保安軍自土門路入寇知延州范雍書召劉平元孫合軍趨土門既又有告賊兵數萬趨金明圍延州雍復召二帥還軍救延

州平督騎兵先發步卒繼進夜至三川口西十里營令
騎兵先趨延州奪門詰朝步兵未至元孫與平還逆之
行二十里遇步兵及鄜延駐泊都監內臣黃德和碎金
谷巡檢万俟政郭遵所將兵皆至步騎萬餘結陣東行
至三川口遇賊是日官軍殺賊鐵騎六七百人及蔽盾
為陣者八九百人平左耳右脛皆中流矢薄暮賊復以
輕兵來戰官軍少卻黃德和居陣後遂走保南山追之
不止遣軍校以劍遮士卒得千餘人轉鬪三日夜衆寡

不敵遂皆被執平不復食仍數罵賊遂遇害年六十八
元孫不死及元昊納款乃得歸德和既遁輒誣平及元
孫降賊朝廷以禁卒圍其家命殿中侍御史文彥博內
臣梁致械詣河中府置獄遣知同州待制龐籍往訊焉
具得其狀延州吏民亦詣闕訴平等實戰歿遂釋二家
惟戮德和梟首延州城下賜平家信陵坊第一區贈平
節度使平妻南陽郡夫人子慶孫宜孫昌孫貽孫孝孫
季孫及三弟四孫咸贈賜官謂元孫已死亦贈節度使

子孫贈秩賜官者八人及歸言者請誅其辱國之罪上特貸之安置全州還卒年七十二子宗道宗易宗尹宗亮宗廣宗求平剛直任俠善弓馬初知果州南充縣以父喪解官還任安州道中遇賊十數以刃臨之平引弓三矢斃三人餘遂遁去其帥鄜延初上攻守之策不為不知邊事特志常輕賊而自處以必勝又衆因德和而潰遂至陷歿聞者傷之

王珪開封人初應募為親從官累以戰功擢至禮賓副

使涇州駐泊都監餘并耿桑事見任福傳

耿傅字公弼祖昭化以不屈於賊而死傅以蔭補累官將作監丞知河南府永寧州知州宋綬薦其才除通判儀州徙慶州

桑懌雍丘人舉進士不中移居汝潁間諸縣多盜自請補耆老殺獲殆盡其鄰因之無盜京西轉運使表其事授邠縣尉徙澠池而朝廷特改右班殿直積官內殿崇班涇原路兵馬都監

任福開封人初補御士由諸班遷至刺史始擢邊任以功遷至賀州防禦使知慶州兼環慶路都副總管慶厯元年詔福往涇原路計議邊事適安撫使韓琦行邊趨涇原聞元昊閱兵折董會謀入寇遂以兵萬八千人命福統諸將擊賊以耿傅叅軍事桑懌為先鋒王珪及涇原都監禮賓副使武英各以所部兵從福節制琦面授福及諸將方略俾併兵合勢自懷遠城趨德勝寨至羊牧隆城出賊之後諸寨相距僅四十里道近且易照應

糧草足供如未可戰則據險設伏待其歸然後邀擊之
福等就道琦又至城外重戒之福自新壕引輕騎數千
趨懷遠城撩龍川遇鎮戎軍都同巡檢常鼎劉肅與賊
戰於張家堡斬首數百級賊偽北桑懌以為然遂引騎
趨之福亦踵其後會合軍屯好水川朱觀武英耿傅屯
籠絡川相距五里謀者言賊兵少故福等輕之追奔三
日鬲糧不繼人馬饑乏至籠竿城北遇賊距羊牧隆城
五里結陣以抗官軍諸將見其兵勢之衆方知墮賊計

中勢不可留遂前接戰桑懌劉肅先戰歿福繼之珪及武英而下皆陷焉獨朱觀保民垣四向縱射會暮獲免自主將叅軍至偏裨死者十數軍校又數倍之士卒踰六千人福等貪功輕敵不能稟韓琦併兵合勢之言以至覆敗奏至上甚悼之贈福節度使兼侍中賜第一區三子一姪一孫贈秩咸賜官王珪贈觀察使三子賜官耿傳贈右諫議大夫五子賜官三人為京秩桑懌贈防禦使子湜推恩加等其餘褒贈有差福之子曰懷德懷

譽懷謹姪懷玉孫惟恭珪之子曰光祖光世光嗣傳之
子曰瓊璩璋珪琬康定初元昊寇鎮戎軍珪將三千騎
為先鋒自瓦亭至師子堡賊圍之數重珪奮擊多獲首
級乘間叩鎮戎軍請益兵不許止絕糧與之士卒既飽
珪語之曰兵法以寡擊衆必在暮我兵少乘其暮氣之
衰可得志也乃馳入賊一將以鎗直其背傷右臂珪左
手以杵碎其腦一將復以鎗進珪挾其鎗運鐵鞭擊死
之敵驚遂引去上聞特遣使獎諭以其下死傷多止賜

名馬金絹仍暴其功以勵諸將珪以所得二鎗植山上
及珪死邊人即其所為立廟焉珪通陰陽術數好水之
戰自知其不得還將行謂其家人曰可速去無為敵所
仇也及敵攻瓦亭果購其家人屬如珪之言珪所將兵
止五千連鬪三日諸將俱歿珪望福陷賊猶欲援出之
軍校顧望多不從珪斬以徇乃復入戰擊殺數百人鐵
鞭撓曲手掌破裂三易馬猶馳擊數百人矢中目還軍
中卒武英常勸耿傳曰君非主兵者柰何欲與英俱死

也朱觀亦戒傅少避銳鋒傅不答於軍中指顧自若求與英俱死或謂福之敗由傅督諸將稍急韓琦得傅為朱觀貽書戒以持重尹洙亦作閔忠辨誣二篇真諂遂息憚善用劍及鐵簡有智略謹畏常若不足所至寇盜衆所不能獲者必獲之其功賞推之居己上者或譏其好名歎曰若欲避名皆不可為也益自信

葛懷敏開封人感德軍節度使霸之子以霸蔭補供奉官其妻王德用之妹也懷敏通時事善希合故多薦其

才者積官眉州防禦使涇原副都總管慶歷二年元昊
寇鎮戎軍懷敏領養馬城會將聞賊兵徙壕外遂帥諸
將趨定州劉賀以蕃兵五千與賊戰不勝而潰懷敏入
保定川寨曹英又敗於寨之東北隅懷敏所部人奔駭
懷敏為衆所擁幾蹂踐死輿至甕城乃蘇賊遂聚火圍
其城懷敏召諸將謀來日結陣赴鎮戎軍因諭其親軍
聽中軍鼓乃得行及鳴鼓懷敏上馬大軍未動馭者勸
未可去有頃復上馬又不從拔劍將擊之士衆遂散乃

策馬至長城壕賊周圍斷其歸路與諸將皆遇害餘兵
為賊所隔及保他寨堡不赴者獲存賊遂長驅直抵渭
州六七百里民受其患初懷敏除鄜延而主帥范仲淹
言其怯懦不知兵遂徙涇原卒敗事如仲淹言定川奏
至贈懷敏節度使諡忠隱子宗晟宗壽宗禮宗師皆贈
秩或賜官

郭恩開封人初隸諸班出為左侍禁累有戰功積官崇
儀使并代鈐轄管句麟府軍馬事初夏人歲侵屈野河

地至耕穫時輒屯兵河西以誘官軍經略使龐籍戒邊將勿與戰月餘食盡去如是屢矣是歲正月出屯三月始去并州通判司馬光行邊至河西白草平數十里無寇跡時知麟府州武戡通判夏倚已築一堡又與光議乘寇之去出其不意別創二堡據其地使不得耕功畢則廢橫戎臨塞二堡徙兵實新堡列烽燧自衙門紅樓下視其地如指掌堡成三十里外田寇必不敢耕矣籍從光議遂築二堡恩與武戡及走馬承受內臣黃道元

以巡邊為名往按視之謀者言寇兵屯沙黍浪十五里不絕恩欲止道元怒以言逼恩恩遂夜率步騎千四百人循屈野河北行見卧牛峰舉火戡曰敵知吾輩出矣道元曰此若輩之為也俄聞鼓聲亦不信比明遇賊自旦戰及食時敵四面合擊武戡走東山趨城東掖門以入恩與道元皆陷賊恩死之贈觀察使子中言中彥中良中謹弟思竝贈秩或賜官給恩舊俸三年

馬遂開封人初補散職為北京指揮使聞王則叛中夜

叱咤晨興詣留守賈昌期請與行陣命持榜招降則盛
服見之與坐遂諭以禍福則不答遂扼其喉擊之流血
賊徒驍捷卒石慶斷其一臂遂詬之曰妖賊吾恨不斬
汝萬段即被害時張得一侍賊側上聞遂死深嗟惜之
贈遂宮苑使五子竝賜官得石慶付其子使剖心祭遂
景泰字周臣普州人天禧三年登進士第累官至都官
員外郎知成州元昊反有薦泰知兵召到換左藏庫使
知寧州泰通判慶州日常上章言元昊包藏禍心主將

任福無長策凡三上不報及元昊寇鎮戎軍敗葛懷敏
初入攻渭州泰率兵五千開道赴援戮先鋒殿直張向
逗遛而行遇賊於彭陽西依山為陣陰選三百騎為左
右翼張旗幟為疑兵賊愕視不敢進而遁士卒請追擊
泰止之搜山果得伏兵與戰斬首千餘級以功遷西上
閤門使久之加忠州刺史秦鳳路都總管卒年五十八
子思問思安思忠思立思誼

趙滋字子深開封人以父戰死補奉職累擢至端州防

禦使步軍都虞候卒年五十七滋常為涇原儀渭州巡檢得勝寨主姚貴殺監押崔詢劫宣武神威騎卒千數叛攻羊牧隆城滋領兵至餘人降獨貴走出寨招討使命滋給賜降者及遷補將吏滋曰是誘其亂也藏其檄不下招討使怒之功遂不及賞范仲淹韓琦舉滋可將領滋在京東數獲盜不自言知青州富弼言於上獲蹤等遷官管句河東經略司公事建言代州寧化軍有地萬頃可募種田作教以戰射令護塞從之其利甚博契

丹人數乘小舟漁界河者吏莫敢禁更造大舟十數運鹽海口滋捕殺之移文涿州遂不復至後因虜使言朝廷乃擢使管軍故事邊州米出外界不許過三斗滋知雄州契丹大饑滋曰彼亦民也米出無所禁滋剛果有才特矜傲自譽人多誦之

李緯字仲文以父廣東提點刑獄遺恩補借職累擢至西上閤門使卒年七十贈引進使陵州團練使子師中積中純中緯常知渭州請修籠竿城瓦亭寨及以籠竿

為德順軍范仲淹韓琦遂舉緯知德順軍招蕃部內屬者數百帳葛懷敏既陷歿元昊因攻瓦亭籠竿皆不能下雄州未有常平倉緯知州以賜公使錢置馬及民饑遂獲均濟

范恪字許國開封人隸軍籍選行門歷龍旗直散員押班試換內殿崇班積官至兩使留後卒年五十贈節度使子愈愿總想恕愚應隱懿億恪驍勇善射臨敵敢前初為慶州北路都巡檢預攻破白豹城兵還賊襲其後

恪設伏擊之殺獲甚衆常會諸道兵攻十二盤暨吐當
述子寨中流矢神色自若至暮以言激衆士卒爭奮遂
得其城有弓勝二石一斗其箭鏃如鏃臨陣必中間有
一矢貫二人者敵畏之從奪蕉蒿寨歸恪殿後敵以數
千騎來襲恪止有二鐻箭引滿不發賊欲相及輒復避
去終莫能近

張亢字公壽濮州人天禧二年登進士第以通判鎮戎
軍常上言元昊喜誅殺勢必難制宜為邊備又論西北

攻守繼而契丹聚兵幽涿間遂擢如京使知安肅軍因
入奏言其主孱而歲款方藉金帛之賜特懼中國見伐
而為此耳卒不敢動如亢言自是數歷西北邊任積官
至客省使眉州防禦使徐州總管卒年六十三子杰黠
焄烈儻寶元間夏賊破豐州圍府州及解去屯瑠璃堡
縱游騎擾邊廊府閉壘二年矣亢受命為并代都鈐轄
麟府軍馬事至城下示以敕始開闕亢入命不復閉縱
民庶出入時雖有禁卒數千皆畏怯無鬪志亢乃募役

卒取敢戰者得數百人使擊賊有以首級獻者必厚賞之禁卒慙始請劾死亢度其可用遂命擊瑠璃堡而破之士氣益振明年詔遣中使督亢護麟府郊賞物錢賊鈔略不得乃悉衆邀其歸路亢以三千敗賊數萬衆既而亢築建寧寨度賊必至虎翼軍驍勇賊人所畏而萬勝軍疲怯敵常易之故更去兩軍旗幟賊果出爭亟趨萬勝而先犯之不知乃虎翼也賊大潰斬首二千餘級不敢復出未踰月築成清塞百勝中候建寧鎮川五堡

而麟府之路始通亢復奏以所通特一徑請更增竝邊
諸柵以安河外議未下徙知瀛州復除并代副總管御史
梁堅劾亢以庫金於成都市易奪官降為鈐轄夏人與
北敵戰河外乃復副總管知代州范仲淹宣撫河東因
奏使亢就總前議增築諸柵事經略使明鎬移文止之
亢不聽不閱時諸寨成遂自劾違鎬節制朝廷不問蕃
漢歸者數千戶歲減戍卒萬人徙知瀛州言城小而人
衆請廣其東南闕為緩急備安撫使夏竦惡其在陝西

不附已遂沮止其後卒城之如亢議徙渭州陝西轉運使奏亢擅減三司郊賞物估值會竦入為樞密使遂奪亢防禦使御史宋禧又以市易事言奪引進使久之陝西轉運使言亢市易非自入始還將作監復防禦使遷客省使知環州坐與鄰守會境上經夕降曹州鈐轄亢輕財好施不拘小節宴賞過侈雖市易猶不能給然軍政嚴整所至有風力蕃漢多圖其像瞻祀之仁宗常語侍臣曰夏人陷豐州麟府之間震擾亢築堡寨以護民

耕牧築城以包水泉又增大高陽城使民有以自保民
思愛之不忘宜特贈亢遂州觀察使

种世衡字仲平放元子也以放蔭授將作監主簿累
遷太子中舍通判鄜州建言築青澗城其左可致河東
粟其右可捍延安其北可圖銀夏詔從其議特換內殿
崇班知城事積官東染院使環慶路鈐轄卒年六十一
子詒諫詠諂諛記訢誼世衡在青澗城開營田二千頃
又募商賈貸以緡錢使通貨賄人爭歸焉城初無水穿

井百五十尺至石乃曰能屑石一畚者酬百錢居數日及泉民甚賴之知環州蕃部有牛家族奴訛者崛彊不出見郡官聞世衡至郡郊迎約詰朝往勞其族晨興雪三尺左右曰地險不可行世衡曰信不可失比至奴訛大驚率其族拜馬前因請內屬凡邊民有過則使之射四發二中者釋其罪兩辭疑而不決者亦因射中否而與決之境內之人因多善射者臨邊數年積穀通貨撫養士卒能得死力在環慶病告中得范仲淹檄與蔣偕

同築細腰城力疾奔命城成而卒羌酋相率朝夕臨之
仍圖其像永以瞻慕

劉滬字子濬保州人父文質任連州刺史子十六人滬
滬有聞滬以父任為奉職積官內殿崇班知水洛城卒
年四十八滬頗習書傳有智略韓琦范仲淹薦其才武
擢閭門祇候常為瓦亭寨監押權靜邊寨又破穆寧生
氏西南去略陽二百里中有城曰水洛川平土沃有水
輪銀銅之利環城族帳多聚漢民之逋逃者曹瑋在秦

州常經營久之未能得滬密使說其城主鐸廝那令內
附會四路招討使鄭戩行邊滬遂名鐸廝那及戎落尊
屬來獻結公水落露羅甘地乞冠帶為屬戶戩許之因
令滬以兵往受地既而氏情中變滬深入無援獨以千
人擊潰氏兵數萬其酋請服因盡驅隸麾下通秦渭路
涇原帥尹洙檄令罷役不從益增版趣役名之屢亦不
至洙令狄青械滬及董士廉付獄戩雖已罷四路而論
奏不已朝廷遣魚周詢程戡相視乃復以滬訖役而任

以城事城既成猶坐違帥臣命降一官首發瘍卒水洛
居人留葬而立廟城隅歲時祀之有碑紀其事今存焉
朝廷從蕃官等請嘗命其弟淳為水洛城兵馬監押
張君平字士衡磁州人以父戰歿補三班差使黔州指
揮使獠寇邊君平領兵設伏奪寨斬首百餘級遷三班
奉職為施州監押積官至作坊使卒子造遜達君平有
幹才明水利朝廷議河事必訪之守官汭口建言請審
擇口地歲省役渠工百餘萬雖役不歲興而可免堙塞

之患又請沿河令佐植榆柳萬株者書為課又請以時
疏導宋陳宿毫蔡潁單滑州溝洫與畿內相接者以免
水患令州縣官吏兼管勾溝洫河道言皆施行

孟元字善長洺州人少隸禁兵以挽彊補殿侍累擢至
眉州防禦使卒年六十贈觀察使子防隨王則據貝州
叛元為真定府路鈐轄領兵攻討被數十鎗又中飛石
墜壕中既出益銳更募敢死士由永濟渠穴地以進賊
平進右騏驎使御史中丞郭勸言賞未當功擢普州刺

史知滄州其民以鹽為生穀歲商賈不行元度軍食之
餘以穀易鹽民賴以濟元雖出行伍好讀書流輩鮮及
馬懷德字得之開封人父玉東頭供奉官常自言懷德
可試武藝補奉職累擢至步軍副都指揮使留後卒年
五十六景祐二年懷德為延州東路巡檢數以少擊衆
徙青澗城監押入賊境焚二寨親射殺其酋狗兒廂主
又率蕃漢兵焚蕩賊海滿申州茶山五十寨三百餘帳
斬馘百餘級奪獲畜產萬計用范仲淹韓琦舉為閣門

祇候知延州龐籍奏為東路巡檢使殄黑神厥堡等大寨又以兵數千敗賊四萬騎於僕射谷徙鄜延路東巡檢都監破賊青化押班吃當三寨殺擄其人物甚眾元昊納款與國子博士高良夫會西人畫地是時用兵之久人民流散懷德招輯有方經畧使梁適奏請推其法諸路詔從之

許懷德字師古開封人以父任為東西班殿侍累擢至寧遠軍節度使又歷保寧建雄兩鎮殿前都指揮使卒

年八十四贈侍中諡榮毅子士平士宗士端士寧士勤
士臻士演士先士溫初懷德為廊延路副總管賊以三
萬騎圍永平寨止率勁兵千餘人突圍破之賊有出陣
前據鞍慢罵者懷德引弓射之應弦而斃未幾賊攻延
州懷德領兵間道出其不意左右奮擊賊遂解去其後
以不赴援而失賊及理財產三被降徙慶厯間遂入總
禁旅典司宿衛凡十四年以老乞身上未之許後復自
言恐為御史所彈不得善罷上特詔有司為減歲數懷

德雖老習軍旅之事然戰功所可見者一二而故事節
度使移鎮加恩皆再表辭翰林學士歐陽脩以為慢朝
廷詔以修章示懷德雖悚息謝罪而終亦不復別進表上
亦不加責

隆平集卷十九

欽定四庫全書

隆平集卷二十

宋 曾鞏 撰

外國

契丹耶律隆緒年十二嗣其父明記位明記偽號景宗
初名舒嚕德光之子也唐初契丹八十餘年未常寇邊
通天時李盡忠始陷營州明年總管楊元基以奚軍攻
潰其衆至開元十一年可突于奉盡忠之弟邵固統衆

詔許襲王方是之時猶稟命中國如此梁正明間耶律安巴堅始建元神策遂以五十萬衆從晉叛將盧文進寇幽州龍德初復入為鎮州張文禮之援明年晉王大破之於新城而獲安巴堅之子自是繼為邊患及安巴堅死子德光繼立晉祖因其兵勢而得天下故兼臣禮而父事之割地以為壽輸帛以為貢未更一紀之久已貽開運之禍其後劉崇崛起於太原為計亦出於此有以益其驕僭也德光滅晉而歸死於鎮陽之殺虎林其

兄之子永康王烏雲自立為天授皇帝囚其祖母舒魯氏於木葉山舒魯氏安巴堅之妻也烏雲五年為其族舍音所殺舒魯討其亂因自立為天順皇帝更名謂之明記太平興國末明記死其妻專國事雍熙間曹彬北伐失利於岐溝隆緒數內寇者謀皆出於母氏也咸平二年舉國而來范廷召大破其衆斬首萬餘級雖遁而未懲故景德初復大舉戎馬及於澶魏之郊真宗大駕再莅河朔甫次衛南而契丹謀將達蘭已斃於我師之

強弩謀窮勢蹙始因王繼忠之表請修好息兵天聖末
隆緒死宗真立宗真隆緒之第八子也母曰順聖元妃
隆緒遺命以正室齊天皇后太后為元妃蕭氏為太妃
太妃殺齊天而自立為太后多殺戮功臣而專用其兄
弟御宗真甚嚴宗真不能堪景祐初遂率兵逐其母使
守隆緒塚其國人有勸迎其母以覬朝廷歲賜之物雖
從之而所居相距常十餘里蓋懼其或相害耳慶歷二
年聞元昊叛遣蕭英劉六符來請石晉所割瓦橋關十

縣詔富弼張茂實往報馬歲復增銀絹二十萬皇祐元年遣使來告伐元昊明年來告捷至和初又齎其畫像來欲求御容未及往而宗真死其子洪基立宗真廟號興宗在位凡二十五年常與教坊使王稅輕十數人結為兄弟出入其家或拜其父母常夜宴與劉四端兄弟及王剛等數十人入樂隊命后妃易衣為女冠后父蕭穆濟言漢官皆在此后妃入戲非所宜也宗真擊碎后父首曰我尚為之若女何人也間常變服入酒肆寺觀

如王剛姚景熙輩常過於微行中皆顯官宗真敬佛教僧正拜三公三師兼政事令者二十人左右所親信多擢為將相契丹國境自幽州東行五百五十里至平州又五十里至古遼城謂之東京北六百里至烏舍國東南接高麗北至女真東踰鴨綠江即新羅也

夏國趙保吉姓拓拔其遠祖仁福者思恭之族也唐僖宗始以思恭為夏州節度使賜國姓思恭族亂仁福繼之故亦稱李氏仁福死子彝超興相繼為定難軍節度

使彛超而上五代史有傳彛興死

興本與宣祖廟諱下
殷字同故改曰興

子光獻繼光獻死子繼筠襲繼筠死弟繼捧襲位其從
父綏州刺史克文言繼捧不當襲請遣使與偕至夏州
諭令入覲繼捧乃舉族歸朝其弟繼遷在銀州太宗賜
以國姓俾隸屬籍又賜繼捧名曰保忠繼遷名曰保吉
為夏州節度使歸鎮初保忠之來覲也保吉言乳母死
出葬郊外匿兵器葬車中遁入蕃族收部曲散亡者劫
西羌種落為邊患雖賜姓名而侵擾夷落不已保忠歸

又潛與表裏遂往依之保吉不納復還夏州牙校已據其城保忠不得入及王師進討俘保忠以歸故保吉因并夏州之地真宗即位始遣使修貢朝廷遂以保吉為夏州節度使未幾乃攻陷清遠軍及靈州景德元年劫西蕃至西涼府潘羅支詐降保吉受之羅支合六谷蕃部擊之保吉中流矢死其子阿移襲更名曰德明而遣使請命於朝廷明年奉表歸款請市青鹽不允乃閱馬謀內寇時秦翰曹瑋請進兵討擊上以其人常已歸款

不許遂以向敏中知延州令撫納之敏中請名其子弟
宿衛德明不從止上誓書并錄保吉遺言以聞真宗念
邊兵久戍乃授德明定難軍節度使加西平王又請行
青鹽不允遂出大里河築柵蒼耳平八年築堡西州濁
輸谷建榷場以誘致商旅詔沿邊禁止自是開擾邊境
攻陷甘州取西涼府天聖中德明卒子元昊立元昊既
長德明數語之曰國中三十年不披皮毛而衣錦綺之
衣汝無負天子也吾常從事於兵雖勞苦萬狀第自困

耳及死贈太師尚書令德明娶米母氏生元昊咩朱氏
生魂成元昊以五月五日生小名崖塊羌謂惜為崖謂
富貴為塊性克悍多猜忌曉浮圖法通漢文字几案間
常致律法書自為蕃書十二卷文類符篆建蕃學使蕃
官子弟習之襲德明官為定難軍節度使檢校太師兼
侍中封西平王天聖十年改元明道元昊避其父名止
稱顯道景祐元年遂僭改元開運入寇環慶殺掠居民
詔約束之米母氏族人山喜謀殺元昊事覺醜殺其母

沈山喜之族於河自是攻略諸羌屢為邊患其從父山
遇知元昊有反計勸止不從山遇懼挈族來歸知延州
郭勸乃執以還元昊至則殺之是歲僭帝號國稱大夏
改元天授明年遣使來告詔削奪官爵除屬籍既而為
慢書留旌節敕告於歸孃族而去康定元年寇金明執
監押李士彬而劉平石元孫陷於三川口慶厯元年任
福戰歿於好水川明年復戰定川寨葛懷敏死焉未至
定川常遣李文貴欲納款知延州龐籍意其詐留未遣

復數月果入寇籍召責其使而釋遣之文貴去月餘復來籍視其書未去僭號卻之俾自請明年上書更名曩宵稱男不稱臣籍又拒馬詔遣卻良佐張士元等更往議之而曩宵之使繼至四年冊為夏國主令稱臣稟正朔改所賜敕書詔而不名聽自置官屬遣使至京許就驛貨易宴坐朶殿朝廷使至其國用賓客禮歲賜銀絹綵共二十五萬五千於是始歲修貢曩宵用兵多詭計左右用事之臣有疑必誅先世居室衣冠文字莫不改

革其文人服靴笏幘頭武臣金帖鏤冠衣緋衣金塗銀
黑束帶佩蹀躞穿靴餘皆禿髮耳重環衣紫旋襪六垂
束帶佩解錐刀弓矢垂鮑皮鞍馬帶纓議事即率諸酋
適野藉草而坐其俗舊止重冬至自曩宵僭竊乃更以
四孟朔及其生辰相慶賀曩宵七娶其五曰野利氏身
頎長有智謀曩宵畏之戴金起雲冠使它無得冠者生
三子獨寤令哥存僭稱太子又納沒啜女營天都山居
之野利氏之叔遇乞有言而曩宵殺遇乞得遇乞之妻

生諒祚慶歷七年甯令哥弒曩宵不死傷其鼻而去匿
黃蘆為訛屍所殺曩宵因鼻傷卒年四十六子諒祚襲
自仁福至繼筠世居夏州及保吉變詐跋扈外侵西羌
種族內竊靈綏銀夏至德明攻陷甘州拔西涼府其地
東西二十五驛南北十驛自河以東北十有二驛而達
契丹之境至曩宵破瓜沙肅州遂盡得河西之地在德
明時兵十餘萬而已曩宵之兵踰十五萬自謂地廣兵
勁敢行僭叛然而不通互市歲賜仍絕六七年間亦已

困弊不如是其寇攘之患固未易息也西北少五穀軍興糧饋止於大麥華豆青麻子之類其民則春食鼓子蔓鹹蓮子夏食苳蓉苗小蕪蒹秋食席雞子地黃葉登廂草冬則畜沙葱野韭拒霜灰蓀子白蒿鹹松子以為歲計其人能寒暑饑渴長於騎射而不能槍刀出戰用隻日避晦日齋糧不過一旬弓弩用柳榦皮弦雨雪則不能施兵行晝揚沙夜舉火以為斥堠將出兵先卜四一用艾灼羊夾面骨以求兆謂之爻勃焦二擗竹於地

若操著以求數謂之擗算三夜以羊焚香呪之又燒穀
火撒之靜處晨屠羊視其腸胃通通則兵無阻心有血
則敗四以矢擊弓弦而聽其聲知敵至之期及兵之勝
負民居皆立屋有官爵者始得覆之以瓦其部族一家
號一帳男年十五以上為丁有二字丁者取正軍一人
負擔一人為一抄負擔者隨車雜使也四丁為兩抄餘
號空丁願隸正軍者得射它丁為負擔無則許射正軍
之疲弱者為之故壯者皆戰鬥而得軍為多欲西用兵

則自東點集而西欲東則自西點集而東年六十以下十五以上皆自備介冑弓矢以行好立虛寨多設伏兵馬軍用鈎索絞聯雖死馬上不落凡正軍給長生馬馳各一死則償之每入寇必先犒飲山訛者橫山羌也其主將皆陣後立馬督戰得中國人無藝者使耕於河外或守肅州城驍勇則刺為軍蕃族有和斷官擇氣直舌辨者為之以聽訟之曲直殺人者納命償百二十千俗喜復仇然有凶喪者未復負甲葉以為記不能復者集

鄰族婦人烹牛羊具酒食介而趨仇家縱火焚之其經
女兵者家不昌故深惡焉

喃嘶囉初名欺南陵溫錢逋生磨榆國蓋吐蕃贊普之
苗裔也同羌西部族未有服屬大姓聳昌厮均等咸平
中迎至河州欲立文法請更其名曰喃嘶囉河州人謂
佛為喃謂兒子為嘶囉於是宗哥僧李立遵與邈川溫
逋哥略嘶囉如郭州立文法部族稍歸之因徙居宗哥
城以立遵為輔大中祥符末嘶囉命立遵率衆十八萬

襲秦州生熟戶知秦州曹瑋以兵擊之趨走西涼府又
為所敗遂與立尊不協徙居邈川更以逋哥為輔遣使
秦州求內屬詔授唃囉邈川首領寧遠大將軍愛州團
練使以逋哥為歸化將軍後逋哥謀亂唃囉殺之而改
蒞青唐景祐中授兩使留後久之朝廷以元昊不臣遣
屯田員外郎劉渙諭唃囉攻元昊適元昊大舉兵襲唃
囉堅壁鄯州不與戰元昊度水常植幟以誌深淺唃囉
潛使移所植及元昊衆潰趨誌處溺死過半自是數以

計敗元昊及元昊取西涼府而唃囉得廝鐸叔之衆十餘萬回紇亦以數萬人歸焉其勢遂強於諸羌朝廷屢加以節命為保順河西鎮節度使洮涼兩州刺史卒年六十九唃囉三子皆被恩命曰瞎魯居合龍谷曰磨魯角居宗哥城曰董魯為唃囉嗣其母喬氏獨居厯精城有才色所部六七萬人號令嚴明莫不畏服

交州李公蘊始為本州大校節度使黎至忠苛虐公蘊常陰贊之故特見親信因令冒姓黎氏大中祥符三年

至忠卒有子纔十歲而其弟明提昶爭立公蘊遂殺之
自稱留後遣使請命真宗曰始黎桓劫丁璿自立公蘊
復爾蠻夷奚責焉遂授靜海軍節度使安南都護交趾
郡王大中祥符七年因捕狄獠寇如洪寨詔轉運使追
所略生口因飭戒之天聖中又令其子弟率衆入寇詔
發峒丁討捕未幾卒子德政自稱留後來告哀天聖六
年除檢校太尉靜海軍節度使安南都護交趾郡王景
祐三年寇邕州之恩陵等州及諸峒略牛馬焚室廬而

去詔責問令捕酋領正其罪寶元初進南平王皇祐間
以兵二萬助平儂智高詔卻其兵而優賜焉久之卒子
曰尊

妖寇

蜀賊王小波李順皆青城縣人淳化三年聚衆為亂先
陷青城縣四年劫彭山縣令齊元振金帛元振率衆拒
之逐元振賊勢漸盛都巡檢使張玘戰歿於江源二月
攻陷成都知府郭載奔東川小波因與張玘戰傷病卒

衆推其妻弟李順為帥既而攻彭漢州成都府順乃僭號建元應運朝廷遣內臣王繼恩同韓守英馬知節石普率師平蜀五年五月破賊擒順獻首餘黨招捕無遺蜀土富饒自乾德間孟昶既降府庫充溢重貨銅布由舟運下三峽輕貨設傳置以四十兵隸為一綱號曰進綱水陸兼運十餘年始悉歸內庫時守臣務利入之厚常賦外更為博買務禁民私市物帛而兼并者釋賤販貴小民貧失家田業故小波以言動衆曰吾疾貧富不

均吾與汝均之貧民由是附之者衆又朝廷常命張樞使蜀樞奏劾官吏不法者百數獨舉彭山縣令齊元振清白彊幹降璽書獎諭元振素貪暴因是益橫受財得金帛多寄民家小波知民怨苦之遂散其金帛殺而剖其腹實以錢刀用快其意是時樞知榮州賊攻州即以郡印及所受告敕降賊受其偽命為榮州刺史王繼恩以聞太宗斬於州市而磔其尸

軍賊王均神衛指揮都虞候益州駐劄咸平三年神衛

卒趙延順以衆怨鈐轄符昭壽多用親隨僕言榜箠軍人因馬逸喧擾中殺昭壽及僕均率衆擒延順及其黨不能獲乃同劫均為帥知州牛冕出漢州均遂僭號建元化順自正月叛奏至以雷有終知益州命內臣秦翰同團練使石普上官正率兵征討九月均敗竄石普秦翰楊懷忠追斬於富順監梟首州市

軍賊陳進宜州澄海軍校景德四年因衆怨知宜州劉永規苛役殺永規及監押國鈞據城叛劫判官盧成均

為帥詔東上閣門使曹利用安撫廣南路率兵進討九月遇賊於象州仙縣擊敗之襲至象州斬陳進及其黨而盧成均挈家屬以降時象州城守四十日矣擢知州大理寺丞何邴祠部員外郎三子皆賜出身以守城功也

區希範環州人常舉進士試禮部景祐五年應募討安化州蠻詣登聞鼓院進狀求錄用下宜州勘會知州馮伸已言其妄邀功賞遂送全州編管既而遁歸與其族

百餘人謀舉兵殺伸己以叛乃殺牛建壇場祭天神推
白崖山酋蒙趕為帝叔區正辭為奉天開基建國桂王
而自為神武定國令公桂牧皆北嚮再拜以為天命又
以區丕績為宰相區志珍為都統使崔盈為節度使區
世庸為飛天神聖將軍蒙懷為百勝將軍譚護為突陣
將軍甘徹為龍路將軍吳程為蜂毒將軍廖陳為遊奕
將軍蒙樛為雷行將軍共偽補三十餘人聚眾二千餘
人慶歷四年攻陷環州得其印遂以環州為武成軍繼

破帶溪普義寨下鎮寧州等處宜州捉賊李德用出韓
婆嶺擊破之獲其偽將崔盈譚護二人希範遂入保荔
波洞間出拒官軍明年詔西京轉運使杜杞加直集賢
院為廣西轉運使兼安撫事杞至宜州得州人吳香獄
囚區世宏及攝官區擘進士曹子華往說諭之又率兵
破白崖黃泥九居山等寨及其五峒斬首千餘級復環
州焚其積聚蒙趕等大怒率其徒隨香出降杞犒以牛
酒六百餘人始與盟置曼陀羅花酒中既昏醉悉殺之

後三日得希範及區丕績等十數人割希範腹績其五藏為圖而醢以賜諸溪峒餘悉就戮

軍賊王則涿州人因歲儉流移至貝州應募宣毅軍為小將初去其鄉母與之訣刺福字背上以為記冀貝間多妖術則習之欲為亂遂給衆言背自然隱起一福字衆惑而敬事之州吏張鸞卜吉者為之主謀慶歷七年冬至郡官赴朝拜遂率其徒劫庫兵以叛執知州張得一囚於獄囚悉縱去通判董元亨不與軍帑鑰首被殺


司理叅軍王獎為獄囚所害監兵田斌鬪不勝而出提
點刑獄田京任黃裳持印棄家屬縋城而去獨得一僇
首事之獲存餘悉死焉則僭稱東平郡王張鸞為宰相
卜吉為樞密使建元德勝旗幟皆為佛字則遣人要虜
使而安撫使賈昌朝謀知命殿侍安素伏兵西門夜俟
其徒出盡得其首級詔遣叅知政事文彥博知開封府
明鎬為河北宣撫使副以平其亂官軍即城南為地道
因日攻其北以牽制之地道成而兵入則始開東門遁

為總管王信所獲檻送闕下封戮都市自反及敗凡六十六日餘衆捕殺無遺其妖書有滴淚經五龍經

廣源州蠻寇儂智高蠻商之子其母阿儂左江武勒之族轉至交趾適儻猶州知州儂全福子全福為交趾所擄阿儂改適蠻商生智高智高長遂殺其父阿儂又為特磨道儂夏卿之妻皇祐四年智高聚衆入寇初陷邕州遂僭號稱其母阿儂為皇太后阿儂克悍有謀嗜小兒肉間以其庖食智高用其計遂自邕攻橫貴龔潯封

藤梧端康州所至驅劫軍民衆至數萬乃進圍廣州朝廷先命楊畋曹修為廣南安撫使經制蠻事又繼以孫沔余靖任安撫使久未奏功遂除樞密副使狄青為宣徽南院使宣撫湖北路經制廣南賊盜事青至合孫沔余靖三將兵大破其衆於歸仁鋪智高夜焚邕州城奔大理國其母阿儂潛歸特磨道依其夫儂夏卿收殘衆得三千餘人復將入寇石鑑世居邕州謀知其動息遣峒丁入特磨道掩襲擒阿儂及智高二子繼宗繼封弟

智光竝檻送闕下阿儂年六十朝廷始欲存之以俟智
高之降及智高已為大理國所殺故悉封戮都市



隆平集卷二十